

La Consejería d'Educación publicó la so propuesta de decretu pal currículu d'Educación Primaria. D'aprobese la propuesta tal como ta redactada, l'asignatura de Llingua Asturiana —y la de Gallego-Asturiano— pasaría na realidá a ser una asignatura optativa, en competencia con otres materies o conteníos que quedaríen a discrección de cada centru.

Si se mantuviere la propuesta fecha pola Consejería, condicionaríase gravemente l'exerciciu del derechu a conocer y estudiar l'asturianu, al enfrentalu col conocimientu y estudiu d'otres materies. Los escolinos y escolines qu'escoyeran cursar l'asignatura d'asturianu seríen discriminaos por nun recibir la mesma formación o refuerzu n'otres materies qu'aquellos que nun la escoyeren.

Les organizaciones sindicales CCOO d'Enseñanza, FETE-UXT y SUATEA, y la Xunta pola Defensa de la Llingua Asturiana afirmamos que l'accesu al estudiu y conocimientu de la nuesa llingua ye un derechu reconocíu espresamente pola llexislación y qu'ha ser respetáu y garantizáu. Pa eso:

- Ha garantizase la non competencia de l'asignatura con otres materies, sean curriculares o non curriculares. Los escolinos y escolines que tengan padres o tutores qu'escoyan nun cursar l'asignatura de Llingua Asturiana —o Gallego-Asturiano na zona más occidental— han recibir la debida atención educativa, pa que la escoyeta d'una o otra opción nun suponga discriminación nenguna. Esa atención en nengún casu ha llevar al aprendizaxe de conteníos curriculares nin asociados a cualquier área de la etapa, como asina recueye la Llei d'Usu del Asturianu nel so artículu 10, apartáu 3: *"...Pa los que lo escoyan, el so aprendizaxe o usu nun podrá torgar que reciban la mesma formación y conocimientos n'igualdá de condiciones que'l restu l'alumnáu."*
- Ha garantizase'l derechu a cursar l'asignatura a tolos escolinos y escolines en tolos centros d'enseñanza primaria. Nun ye aceptable la imposición de ratios, que fagan que'l derechu a cursar l'asignatura de Llingua Asturiana o de Gallego-Asturiano dependa de la escoyeta de los compañeros y compañeres d'estudios.
- Esti decretu nuevu pal currículu de la enseñanza primaria ha abrir la posibilidá del usu del asturianu como llingua vehicular na enseñanza d'otres materies.
- Han entamase midíes pa la normalización de l'asignatura y pa la estabilización del profesoráu.
- En cumplimientu de la Llei, estes midíes han estendese a tolos niveles y graos de la enseñanza non universitaria: educación infantil, primaria, secundaria y bachilleratu.

Estes midíes pueden entendese como válides pa meyorar la presencia marxinal de la llingua asturiana nel sistema educativu, axustandola al marcu llegal actual. Sicasí, ye evidente qu'esti conflictu ñaz pola situación d'indefensión y desprotección arreyaes a la condición de non oficial de la llingua. Si queremos llograr que l'asturianu tea presente nes escuelas d'Asturies en condiciones dignes y de normalidá ye necesario que se-y dea a la nuesa llingua'l rangu llegal que yá tienen el restu les llingües del Estáu: la oficialidá.